

բայց զօրապետն ասէր, վասն խաղաղութեան քաղաքին արարի: Յետ այնորիկ քաղաքապետն ետ շինել զխրամատս սարապի Ս․ Փրկչի, և զայլ քահեալ և ուերեալ տեղիս: ստիպէին զՀայս շինել զնոսա և զնել անդ միաբանս:

Ի միջոցիս այսպիսի խռովութեանց՝ երկուցեալ միաբանացն Հայոց ոչ կարացին երթալ ՚ի Բեթղեհէմ և տօնել զԾնունդ Տեառն, զի փոյթ մեծ էր նոցա պահել զվանս Ս․ Յակոբայ չմտանել Եէնիչէրեաց անդ, որոյ վասն բազումս աշխատ եղեն բանիւք և արդեամբք իսկ:

Հուսկ ուրեմն եհաս հրովարտակն Յունաց յերուսաղէմ (՚ի 12 Յունվարի), և կազմեցաւ ժողով մեծ ՚ի դատարանն. կոչեցին զԹարգմանն և զՓոխանորդն Հայոց, և ընթերցան զայն առաջի բազմութեան, յորում յետ պատմելոյ զբատաստանս Հայոց ընդ Յունաց, Տէրութիւնն շնորհէ զշինութիւն տաճարին Ս․ Յարութեան միայն ազգին Յունաց: Ապա հարցին ցՀայս թէ՛ ունի՞ք ինչ ասել առ այս, և նոքա ասեն՝ հնազանդ եմք օրինաց Շէրիի և հրամանի Արքային, բայց խնդրեմք համբերել մինչ ՚ի գալուստ հրովարտակին Հայոց: Ետուն պատասխանի՝ այժմ Յոյնք ըսկիզբն արասցեն շինութեան ըստ հրամանի Արքային եւ ապա որ ինչ հրամայի վասն ձեր՝ այնպէս առնեմք: Ետուն հրաման Յունաց՝ և ցրուեցաւ ժողովն: Բաջալերեալ և ոգի առեալ Յունաց թերի թողին զշինութիւն Գերեզմանին Քրիստոսի, և փութացեալ կանգնեցին փայտակերտս առաջի մեծի դրան ՚ի ներքին կողմն, և սկիզբն արարին շինել զբաժին տեղիս Հայոց, զսենեակս Տեսչին և զվերնատունն՝ այլովքն հանդերձ. ժողովեալ զքարինս շինուածոց նոցին, զատարկեալ հանին արտաքս զկահ և զկարասին Հայոց, և եղև միաբանաց և ուխտաւորաց տարւոյն սուգ մեծ եւ անմխիթար տրամութիւն առաջի աչաց տեսանելով զյափշտակութիւն դարաւոր իրաւանց ազգին. և ժողովեալ ոմանց իբրեւ անձինք 20, ցաւ ՚ի սիրտ գրեցին առ Իշխանաւորս ազգին ՚ի կոստանդինուպօլիս հոգալ զկարեւորն և բառնալ յազգէն զնախատինս Յունաց (՚ի 24 Յունվարի):

Իսկ զօրավարն Ապուղուրեան յետ բառնալոյ զխռովու-